

Na osnovu člana 8. stav 3. alineja 4. i 23. Zakona o principima lokalne samouprave („Službene novine Federacije BiH“, broj 49/06), člana 6. Statutarne odluke o organizaciji Grada Tuzla u skladu sa Zakonom o Gradu Tuzla („Službeni glasnik Grada Tuzla“, broj: 1/14, 3/15, 7/15 i 12/15), a u vezi sa članom 26. Zakona o zaštiti od požara i vatrogastva („Službene novine Federacije BiH“, broj 64/09), članom 4. stav (2) Zakona o komunalnim djelatnostima („Službene novine Tuzlanskog kantona“, broj: 11/05, 7/07, 8/12 i 14/13), Gradsko vijeće Tuzla, na sjednici održanoj _____ donosi:

ODLUKU o obavljanju dimnjačarskih poslova

I. OPĆE ODREDBE

Član 1.

Ovom Odlukom uređuje se organizacija i način obavljanja dimnjačarskih poslova na području grada Tuzla, rokovi kontrole i čišćenja dimnjaka i uređaja za loženje, nadzor nad obavljanjem tih poslova, kaznene odredbe, a sve u cilju sprječavanja i otklanjanja uzroka požara i opasnosti od plinova i dimova.

Obavljanje dimnjačarskih poslova kao komunalne djelatnosti od javnog interesa za Grad Tuzla, organizuje se u cilju zaštite života ljudi i imovine, te sprječavanja i otklanjanja uzroka opasnosti od požara, eksplozija, trovanja, sprječavanja zagađenja zraka u svim građevinama i prostorima koji koriste dimovodne objekte, kako štetne posljedice ne bi nastupile zbog neispravnosti dimovodnih objekata i uređaja za loženje.

Član 2.

Pod dimnjačarskim poslovima smatra se provjeravanje ispravnosti i funkcionisanja dimovodnih kanala i uređaja, te stim u vezi:

- a) provjera ispravnosti i funkcionisanja dimnjaka i uređaja za loženje,
- b) obavljanje redovnih i vanrednih pregleda dimnjaka i uređaja za loženje,
- c) čišćenje dimnjaka i uređaja za loženje,
- d) čišćenje i pregled dimovodnih i ventilacionih instalacija,
- e) spaljivanje i vađenje čađi iz dimnjaka i uređaja za loženje,
- f) spaljivanje masnoće u roštiljima,
- g) čišćenje dimovodnih instalacija u pekarskim pećima,
- h) poduzimanje mjera za sprječavanje opasnosti od požara, eksplozija, trovanja te zagađivanja zraka,
- i) redovni pregledi dimovodnih objekata i uređaja za loženje (zbog sprječavanja opasnosti od požara i trovanja ugljen monoksidom),
- j) čišćenje uređaja za loženje (kotlovi na parno i vodeno zagrijavanje, kamina, peći, štednjake, peći za spaljivanje),
- k) kontrola uređaja za loženje, vrste goriva prema standardima Instituta za standarde Bosne i Hercegovine i ispitivanje emisije plinova.

Član 3.

Dimovodni objekti u smislu ove odluke su dimnjaci i uređaji za loženje, odnosno usponski i horizontalni dimovodni kanali, spojni kruti elementi ložišta (uključujući dimovodne zaklopke), sabirnice čađi, priključna cijev (dimnjača) uređaja za loženje i drugi dijelovi dimnjaka.

Uređaji za loženje sa sistemom dobave zraka u smislu ove odluke su uređaji za izgaranje krutih, tekućih ili plinovitih tvari, priključeni na dimovodni objekt ili uređaji za odvod ispušnih plinova.

II. ORGANIZACIJA DIMNJAČARSKIH POSLOVA

Član 4.

Dimnjačarske poslove na području grada Tuzla može obavljati pravna osoba i fizička osoba – obrtnik, koja je registrovana za obavljanje dimnjačarskih poslova, ima stručno osposobljene zaposlene, te posjeduje odgovarajuću opremu i sredstva za obavljanje ove komunalne djelatnosti.

Povjeravanje dimnjačarskih poslova na području grada Tuzla, vrši se u skladu sa odredbama zakona kojim se uređuje oblast komunalnih djelatnosti.

Pravno ili fizičko lice kojem je aktom nadležnog organa povjereno obavljanje dimnjačarskih poslova (u daljem tekstu: ovlašteni dimnjačar) obavlja poslove u vezi sa pregledom, čišćenjem i kontrolom ložišta i dimovodnih uređaja, tehničkim prijemom objekata i radovima na području zaštite od požara, zaštite od emisije te racionalnog korištenja energije.

Član 5.

Sva pravna lica, samostalni privrednici (obrtnici) i fizička lica, koja zagrijavanje svojih poslovnih i prodajnih objekata, industrijskih i zanatskih postrojenja, te stambenih jedinica, vrše putem kotlovnica, obavezna su prijaviti ovlaštenom dimnjačaru dimovodne i ložišne uređaje (vrstu i broj) koji podliježu obaveznom čišćenju i kontroli, te osigurati njihovo pravovremeno čišćenje i provjeru prema postojećim propisima, o čemu će ovlašteni dimnjačar izdati potvrdu koju su dužni istaknuti na vidno mjesto u kotlovnici.

Zbog izgradnje novog ili rekonstruisanog postojećeg dimovodnog objekta, promjene uređaja za loženje ili promjene vrste goriva, vlasnik ili korisnik dimovodnog objekta dužan je prije puštanja dimovodnog objekta u funkciju izvršiti sva potrebna ispitivanja i kontrole, te ishoditi dokumentaciju kojom se dokazuje kvaliteta izvedenih radova i ugrađenih materijala.

Ateste na korištenje dimovodnog objekta dužan je pribaviti investitor novosagrađenog, rekonstruisanog ili dograđenog objekta u postupku tehničkog prijema objekta.

Član 6.

Ovlašteni dimnjačar obavlja sljedeće poslove:

- a) redovni i vanredni pregledi postojećih, novosagrađenih, rekonstruisanih ili dograđenih dimovodnih uređaja, ložišta, spojnih elemenata i ventilacijskih uređaja ili sličnih uređaja u pogledu njihove požarne sigurnosti i funkcionalnosti u kojima je dužan radove izvoditi u skladu sa propisima kojima je uređena ova oblast, te davanje atesta na njihovo korištenje,
- b) bez odlaganja, pisanim putem, obavještavanje vlasnika ili korisnika objekta, upravitelja zgrade, nadležna tijela i distributera plina ukoliko je dimovodno-ložišni sistem na plin, o

- nedostacima zatečenim na dimovodnim uređajima, ložištima, spojnim elementima i ventilacijskim uređajima ili sličnim uređajima,
- c) provjera i vještačenje dimnjaka, ložišta, spojnih elemenata i ventilacijskih uređaja ili sličnih uređaja u pogledu njihove požarne sigurnosti,
 - d) savjetovanje u pitanjima tehnologije loženja,
 - e) obavljanje preventivne zaštite od požara i smanjena onečišćenja na području Grada Tuzla,
 - f) pomaganje u suzbijanju požara dimnjaka na zahtjev nadležnog tijela u njegovu području,
 - g) izdavanje nalaza o čišćenju, upotrebnoj ispravnosti i tehničkom prijemu grube gradnje i završnom tehničkom prijemu u skladu sa propisima kojima je uređena ova oblast,
 - h) kontrola i provjera dimovodnih uređaja, ložišta, vrste goriva, spojnih elemenata ili sličnih uređaja u skladu s propisima kojima se uređuje oblast zaštite okoliša,
 - i) nadzor ložišnih uređaja u pogledu zahtjeva koji se postavljaju pred tehničke uređaje odnosno naprave za grijanje ili ventilaciju i kondicioniranje zraka ili uređaja koji služe opskrbi tehnološkom vodom u sklopu pregleda ložišta i dimovodnih uređaja,
 - j) sačinjava i ovjerava izvještaj o kontroli ispravnosti dimovodnih i ložnih objekata i uređaja, kao i saniranju i pregledu izvršenih radova i isti dostavlja na uvid komunalnom, termoenergetskom i inspektoru za zaštitu od požara.

Član 7.

Vlasnici i korisnici dimovodnih objekata ne smiju ovlaštenom dimnjačaru sprječavati pristup do mjesta za čišćenje dimovodnih objekata, niti ga ometati u obavljanju dimnjačarskih poslova. Ista obaveza postoji ako su službenici nadležnog upravnog tijela dužni kontrolisati djelatnost ovlaštenoga dimnjačara ili na osnovu izvršnog upravnog akta prisilno provesti uskraćeno čišćenje ili provjeru.

Radi ispravne kontrole, a na zahtjev ovlaštenog dimnjačara, moraju se ugraditi vratašca za kontrolu i čišćenje radi omogućavanja kontrole i čišćenja dimovodnih objekata, a priključna cijev uređaja za loženje i dimovodnog objekta mora biti demontažna na atmosferskim uređajima za loženje.

Takođe, radi ispravne kontrole i čišćenja dimnjaka, pristup do vratašaca, priključaka, kape dimnjaka i ostalih dijelova dimnjaka, mora uvijek biti slobodan.

Pristup do vrha dimovodnog objekta mora biti izveden tako da je siguran za dimnjačara.

Član 8.

Ako prilikom pregleda ovlašteni dimnjačar ustanovi da:

- a) su zidovi dimnjaka nemalterisani,
- b) su zidovi dimnjaka ispucali,
- c) su u zidove dimnjaka ugrađeni gorivi materijali,
- d) su vratašca na dimnjacima oštećena,
- e) se kroz dimovodne i ventilacijske kanale provlače kablovi za električnu energiju, antenski i telefonski vodovi,
- f) se kroz dimovodne i ventilacijske kanale provlače električne instalacije i instalacije centralnog grijanja;
- g) ima bespravni priključak;
- h) ima priključni kuhinjski napa na dimovodnim objektima i ventilacijskim otvorima,
- i) ima i drugih nedostataka koji se utvrđuju važećim standardima iz te oblasti,

pismeno će pozvati vlasnika, korisnika ili upravitelja zgrade, da otkloni nedostatke u roku ne kraćem od osam niti dužem od 30 dana, zavisno od vrste i složenosti uočenih nedostataka.

Ukoliko se nedostaci iz stava 1. ovoga člana ne uklone u utvrđenom roku, ili se isti nedostatak ponovo utvrdi i pri sljedećem čišćenju i kontroli dimnjaka, ovlaštenu dimnjačar će o tome obavijestiti komunalnog, termoenergetskog ili inspektora za zaštitu od požara.

Ako ovlaštenu dimnjačar utvrdi postojanje neposredne opasnosti po živote ljudi i imovinu koja može nastati daljnjom upotrebom dimnjaka i/ili uređaja za loženje, isti će bez odgode o tome obavijestiti komunalnog i inspektora za zaštitu od požara, te Profesionalnu vatrogasnu brigadu Grada Tuzla, radi poduzimanje mjera iz svoje nadležnosti.

Izuzetno, u hitnim slučajevima kada je ugrožen život, zdravlje i imovina, ovlaštenu dimnjačar je dužan odmah upozoriti ugrožene vlasnike/korisnike objekta, odnosno stanare zgrade i istovremeno obavijestiti inspektora za zaštitu od požara, a po potrebi komunalnog i termoenergetskog inspektora.

U slučaju postojanja neposredne opasnosti po živote ljudi i imovinu, koji mogu nastati daljnjom upotrebom dimnjaka i/ili uređaja za loženje, inspektori za zaštitu od požara mogu zabraniti dalje korištenje dimnjaka i/ili uređaja za loženje dok se uočeni nedostaci ne otklone.

III. KONTROLA I ČIŠĆENJE DIMOVODNIH OBJEKATA

Član 9.

Redovna kontrola i čišćenje dimovodnih objekata koji se koriste tokom ogrjevne sezone, provodi se na način određen projektom građevine, tehničkim propisima, specifikacijama uređaja za loženje i vrstom goriva i ista uključuje najmanje:

- a) vizualni pregled, u koji je uključeno utvrđivanje položaja i veličine pukotina te drugih oštećenja bitnih za očuvanje tehničkih svojstava dimnjaka i uređaja za loženje,
- b) tlačnu probu u slučaju sumnje,
- c) usklađenost uređaja za loženje (kotla, ekspanzione posude, pritiska i temperature u potisu, te dimnjaka).

Za dimovodne objekte koji se koriste i izvan ogrjevne sezone, ili se koriste tokom cijele godine (proizvodni, turistički i ostali privredni objekti, obrazovne, zdravstvene i druge ustanove i slično), redovna kontrola obvezno se provodi najmanje četiri puta godišnje (kvartalno), dok se čišćenje obavlja po potrebi, a najmanje dva puta godišnje.

Vlasnici, odnosno korisnici objekata, dužni su obezbjediti pregled i čišćenje dimovodnih objekata od strane ovlaštenog dimnjačara u sljedećim rokovima:

- a) dimovodni objekti u individualnim i kolektivnim stambenim objektima koji upotrebljavaju čvrsto i tečno gorivo za dimnjake cilindričnog, četvrtastog ili okruglog presjeka, etažni i šent dimnjaci i šent priključci, a koji su u stalnoj upotrebi u periodu od 1. oktobra do 30. aprila, čiste se najmanje jednom u toku godine,
- b) u preduzećima i ustanovama u kojima su dimovodni objekti u upotrebi u periodu od 1. oktobra do 30. aprila, najmanje jednom mjesečno u navedenom periodu, a u slučaju kada se dimovodni objekti neprekidno koriste, čišćenje se vrši svakog mjeseca tokom cijele godine,
- c) čišćenje kotlova na parno ili vodeno zagrijavanje, industrijskih kotlova, i ostalih dimnih, odnosno ložišnih postrojenja, vrši se najmanje jednom mjesečno, tokom cijele godine,
- d) spaljivanje čađi, struganje ili skidanje masnoća hemijskim sredstvima u dimovodnim uređajima iznad otvorenih ložišta (roštilja) za pečenje mesa i mesnih prerađevina na žaru vrši se svakog mjeseca tokom cijele godine,
- e) spaljivanje masnoća sa rešetki roštilja za pečenje mesa i mesnih prerađevina na žaru vrši se svakih 15 (petanest) dana tokom cijele godine,
- f) čišćenje pekarskih peći vrši se svakog mjeseca tokom cijele godine,
- g) čišćenje ventilacionih okana vrši se najmanje jednom godišnje,

- h) kontrola, a po potrebi i čišćenje dimnjaka u individualnim i kolektivnim stambenim objektima koji su priključeni na sistem daljinskog zagrijavanja grada, ili drugi vid zagrijavanja koji ne zahtijeva upotrebu dimovodnih objekata, vrši se najmanje jednom u tri godine,
- i) pregled dimnjaka, dimovodnih i ventilacionih uređaja u svrhu izdavanja atesta o ispravnosti u novosagrađenim, rekonstruisanim ili dograđenim objektima, vrši se prije njihovog stavljanja u upotrebu,
- j) čišćenje dimnjaka za odvod ispušnih plinova i dimnjaka s dovodom zraka za izgaranje i odvodom produkata za izgaranje (LAF/LAS), vrši najmanje jednom godišnje.

Član 10.

Vlasnik, odnosno korisnik objekta dužan je prije stavljanja u upotrebu, obavijestiti ovlaštenog dimnjačara o početku upotrebe dimovodnog objekta koji do tada nije bio upotrebljavan.

Član 11.

U dane čišćenja dimnjaka, odnosno spaljivanja čađi, zabranjeno je loženje vatre u ložištima, a korisnici dimnjaka dužni su izvršiti pripreme za čišćenje, odnosno spaljivanje, tako što će zatvoriti otvore dimnjaka u prostorijama.

Član 12.

Kod dimnjaka koje nije moguće temeljito očistiti, izvršiće se spaljivanje čađi, uz mjere opreza u skladu s propisima o zaštiti od požara, na najpovoljnijem mjestu u dimnjaku.

Ovlašteni dimnjačar dužan je sam obaviti posao ili ga trajno nadzirati.

Vrijeme i način spaljivanja čađi, mora se najaviti vlasniku objekta ili njegovom punomoćniku, stanarima zgrade, vatrogasnoj službi i upravitelju zgrade, pismenim putem, najkasnije u roku od 48 sati prije početka spaljivanja.

Otpadni materijal i čađ nastalu usljed kontrole i čišćenja dimnjaka i uređaja za loženje, ovlašteni dimnjačar je u dužan očistiti i ukloniti na propisani način, kojim se korisniku usluge ne nanosi šteta.

Čađ koja preostane nakon čišćenja dimnjaka, ovlašteni dimnjačar je dužan odnijeti i odložiti u posudu u koju se odlaze kućno smeće.

Ako to zahtijeva požarna sigurnost, uređaji koji podliježu obavezi čišćenja i kontrole moraju se čistiti, odnosno kontrolisati češće nego što to nalažu odredbe ove Odluke. Ovlašteni dimnjačar dužan je dodatna čišćenja odnosno kontrole pisanim putem obrazložiti vlasniku, odnosno korisniku objekta, a o razlozima istih upoznati inspektora za zaštitu od požara.

Član 13.

Ložišta (uređaj za izgaranje krutih, tekućih ili plinovitih tvari, priključen na dimnjak ili uređaj za odvod ispušnih plinova) se ne smiju postavljati u:

- a) stubišnim prostorijama, osim u stambenim zgradama koje nemaju više od dva stana,
- b) hodnicima u svakodnevnoj upotrebi,
- c) garažama, osim plinskih ložišta neovisnih o zraku prostorije koja unutar garaža ne mogu postati toplija od 300 °C.

Ložišta ovisna o zraku prostorije smiju se postavljati u prostorijama, stanovima ili upotrebnim jedinicama usporedive veličine iz kojih se zrak isisava pomoću ventilatora, kao što

su ventilacijski uređaji ili uređaji za grijanje na topli zrak, nape, sušilice rublja na odlazni zrak, samo ako:

- a) se sigurnosnim napravama sprječava istodobni rad ložišta i uređaja koji isisavaju zrak,
- b) se vođenje ispušnih plinova nadzire posebnim sigurnosnim napravama,
- c) se ispušni plinovi ložišta odvede preko uređaja koji isisavaju zrak, ili
- d) je kroz vrstu konstrukcije ili dimenzioniranje uređaja koji isisavaju zrak osigurano da ne može nastati opasan podtlak/podpritisak.

Član 14.

Zabranjeno je:

- a) premještanje otvora na dimnjacima bez saglasnosti ovlaštenog dimnjačara,
- b) začepljavanje i zatvaranje na bilo koji način dimnjaka i dimovodnih kanala, kao i ventilacionih otvora,
- c) neovlašteno spaljivanje čađi u dimnjacima,
- d) neovlašteno upajanje uređaja na loženje (dimnjača ili sulunara) na ventilacione instalacije,
- e) držanje bilo kakve robe, predmeta i lako zapaljivih materija (kartonske ambalaže, drveta, plastike), boca pod pritiskom, plinskih boca, u kotlovnici ili u prostoriji u kojoj je smješten kotao, odnosno neposredno uz i oko kotla/kotlova, koji mogu uzrokovati požar i požarnu opasnost po ljude i materijalna dobra,
- f) skladištenje krutih goriva na otvorenom prostoru,
- g) spaljivanje čađi u dimnjacima za vrijeme jakog vjetera i visokih temperatura zraka (vanjska temperatura preko 20⁰ Celzijusa),
- h) spaljivanje otpada u postrojenjima za sagorijavanje koja nisu namijenjena za spaljivanje otpada, bez obzira da li se oslobođena toplota koristi ili ne.

Ukoliko ovlašteni dimnjačar u vršenju dimnjačarskih poslova utvrdi da je došlo do postupanja suprotno stavu 1. ovog člana, dužan je pismenim putem, u roku od 48 sati, o tome obavijestiti komunalnog inspektora, termoenergetskog inspektora, inspektora za zaštitu okoliša i inspektora za zaštitu od požara.

IV. NADZOR

Član 15.

Nadzor nad provođenjem ove Odluke vrše komunalni inspektor, inspektor za zaštitu od požara i inspektor za zaštitu okoliša.

Komunalni inspektor u smislu ove Odluke vrši nadzor nad provođenjem člana 4, 5, 6, 7, 9, 10, 11, 14. tačka a), b), c), d), i f), i 17. ove Odluke.

Inspektor za zaštitu od požara u smislu ove Odluke vrši nadzor nad provođenjem člana 8, 12, 13, 14. tačka e), g) i h) i članom 17. Odluke.

Inspektor za zaštitu okoliša u smislu ove Odluke vrši nadzor nad provođenjem člana 14. tačka h).

Član 16.

U vršenju nadzora nad provođenjem ove Odluke, komunalni inspektor, inspektor za zaštitu okoliša i inspektor za zaštitu od požara, su ovlašteni da:

- a) narede obavljanje određenih radnji, ako pregledom utvrde da se te radnje ne obavljaju u skladu s odredbama ove Odluke, ili da se ne obavljaju potpuno ili pravilno,

- b) nalažu preduzimanje hitnih mjera ili radnji u slučajevima neposredne opasnosti ili sigurnosti po ljudske živote,
 - c) zabrane korištenje kotlovnica, ako se utvrdi da iste utiču na pretjeranu aerozagađenost ili iste dovode u opasnost rukovaoce kotlovskim postrojenjima usljed nepostojanja ventilacije do otklanjanja nedostataka, odnosno do odstranjivanja njihovog uticaja na aerozagađenost, kao i stvaranje preduslova za punu sigurnost ljudi,
 - d) zabrane upotrebu neispravnog kotlovskog postrojenja, dimnjače, dimnjaka, dok se ne otklone nedostaci,
 - e) izriču/izdaju prekršajni nalog u skladu s zakonima kojima se uređuje oblast prekršaja i komunalnih djelatnosti, te u skladu sa odredbama ove Odluke i,
 - f) preduzimaju i druge mjere u skladu sa zakonom,
- Komunalni i inspektor za zaštitu od požara su ovlašteni da donose pismene i usmene naloge u obliku rješenja i zaključaka za provođenje radnji navedenih u stavu 1. ovog člana.

Član 17.

Pravna lica i odgovorna lica u pravnom licu, samostalni privrednici, kao i fizička lica dužni su komunalnom inspektor, termonergetskom inspektor, inspektor za zaštitu okoliša i inspektor za zaštitu od požara, omogućiti nesmetano obavljanje inspekcijskog nadzora.

Član 18.

Protiv rješenja i drugih upravnih akata komunalnog inspektora, termonergetskog inspektora, inspektora za zaštitu okoliša i inspektora za zaštitu od požara, donosenog na osnovu ove Odluke, može se izjaviti žalba u roku od 8 dana od dana prijema.

Žalba iz stava 1. ovog člana, ne odlaže izvršenje.

O žalbi iz stava 1. ovog člana, odlučuje posebna komisija, koju imenuje Gradsko vijeće (Drugostepeno upravno vijeće Grada Tuzla).

V. KAZNENE ODREDBE

Član 19.

Novčanom kaznom u iznosu od 500,00 do 3.000,00 KM kaznit će se pravno lice, a u iznosu 100,00 do 500,00 KM, odgovorno lice u pravnom licu za prekršaje kako slijedi:

- a) ako obavlja dimnjačarske poslove suprotno odredbama člana 4. Odluke,
- b) ako postupa suprotno odredbama člana 5. Odluke,
- c) ako ovlaštenom dimnjačaru ili službenicima nadležnog upravnog tijela, onemogućiti pristup do mjesta za čišćenje i pregled dimnjaka i uređaja za loženje, ili ga ometa u obavljanju dimnjačarskih poslova (član 7. stav 1.),
- d) ako u propisanim rokovima ne preduzima radove označene u članu 9. stav 2. i 3. Odluke,
- e) ako postupa suprotno odredbama člana 11. Odluke,
- f) ako postupa suprotno odredbama člana 14. stav 1. Odluke,
- g) ako ne postupi po pismenom ili usmenom nalogu inspektora u obliku rješenja i zaključka (član 19. Odluke),

Za prekršaje utvrđene u stavu 1. ovog člana, kaznit će se i pojedinac koji samostalno obavlja djelatnost ličnim radom (samostalni privrednik, fizičko lice - obrtnik) novčanom kaznom od 200,00 do 2.000,00 KM.

Član 20.

Novčanom kaznom u iznosu od 100,00 do 300,00 KM kaznit će se građanin, za prekršaje kako slijedi:

- a) ako kao investitor sagrađenog, rekonstruisanog ili dograđenog objekta ne pribavi atest za korištenje dimovodnog objekta (član 5. stav 3.),
- b) ako postupa suprotno odredbi člana 7. Odluke,
- c) ako postupa suprotno odredbi člana 8. Odluke,
- d) ako postupa suprotno odredbi člana 9. stav 2. i 3. Odluke,
- e) ako postupa suprotno odredbi člana 10. Odluke,
- f) ako postupa suprotno odredbi člana 11. Odluke,
- g) ako postupa suprotno odredbi člana 13. Odluke,
- h) ako postupa suprotno odredbi člana 14. stav 1. Odluke,
- i) ako ne postupi po pismenom ili usmenom nalogu inspektora u obliku rješenja i zaključka, (član 19. Odluke).

Član 21.

Novčanom kaznom u iznosu od 200,00 do 2.000,00 KM kaznit će se ovlašteni dimnjačar za prekršaje kako slijedi:

- a) ako odbije da izda atest na korištenje dimovodnih objekata (član 5. stav 3.)
- b) ako postupa suprotno odredbama člana 6. Odluke,
- c) ako postupa suprotno odredbama člana 8. Odluke,
- d) ako postupa suprotno odredbama člana 9. stav 1. Odluke,
- e) ako postupa suprotno odredbama člana 12. Odluke,
- f) ako postupa suprotno članu 14. stav 2. Odluke,
- g) ako ne postupi po pismenom ili usmenom nalogu inspektora u obliku rješenja i zaključka, (član 19. Odluke).

VI. PRELAZNE I ZAVRŠNE ODREDBE

Član 22.

Vlasnici i korisnici postojećih dimovodnih objekata, koji na dan stupanja na snagu ove Odluke nemaju atest na korištenje dimovodnog objekta, dužni su isti pribavit u roku od jedne godine od dana stupanja na snagu ove Odluke.

Danom stupanja na snagu ove Odluke prestaje da važi Odluka o obavljanju dimnjačarske djelatnosti ("Službeni glasnik Općine Tuzla", broj: 5/99).

Član 23.

Odluka stupa na snagu osmog dana od dana objavljivanja u "Službenom glasniku Grada Tuzla".

**GRAD TUZLA
GRADSKO VIJEĆE**

**Broj:
Tuzla,**

PREDSJEDAVAJUĆI

Jozo Nišandžić